

曾文正公奏稿

第三函
六冊

曾文正公奏稿

卷之二十五目錄

湘軍在新野南陽勝仗摺

同治五年九月十三日

淮軍往來剿賊勝仗摺

全日

水師報捐請廣學額摺

全日

彭玉麟報捐歷任養廉片

續假調理片

彙報近日軍情摺

十月十三日

病難速痊請開各缺仍畱軍中効力摺

全日

請暫註銷爵秩片

淮軍勝仗詳細情形摺

全日

黃翼升回駐江甯片

調鮑超劉松山兩軍分路援剿摺

十一月初二日

奉到諭旨先行覆陳片

近日軍情片

酌籌西路軍務派員辦霆營軍米摺

十一月十七日

欽奉諭旨覆陳摺

全日

刊用木質關防片

近日軍情片

欽奉諭旨再陳下悃摺

十二月初三日

近日軍情片

銘軍攻克黃陂等處五案併保摺

全日

暫回本任仍駐徐州並陳下悃摺

十二月二十一日

近日軍情片

陳明皖餉支絀片

出洋委員容閔請獎片

回駐徐州接篆任事摺

同治六年正月二十一日

近日軍情並陳鮑超暫緩入秦片

彭玉麟懇辭獎敘片

報銷款目分四案開單摺

二月初八日

安徽抵徵比例請銷片

補發湘軍欠餉作第四案續報之款片

恭報自徐州起程日期摺

二月十四日

張樹珊在周家口建祠片

張錫嶸在陝西陣亡請加恩片

覆陳祝塏被參一案片

報回省日期並近日軍情摺

三月二十日

通籌酌解陝甘軍餉片

鮑超傷疾甚劇酌調大員統軍摺

四月初七日

奏撥三成洋稅銀片

終

湘軍在新野南陽勝仗摺

同治五年九月十三日

奏爲官軍在新野南陽等處迎剿張牛逆股疊獲勝仗恭摺仰祈

聖鑒事竊皖南鎮總兵劉松山宣化鎮總兵張詩曰在新野等處剿賊獲勝臣於八月十二日附奏大概在案旋據劉松山等稟稱七月十四日聞宋慶一軍在刁河被圍立即拔隊馳援十五日行抵南陽探知豫軍業已解圍該逆向東南竄過瓦店一帶適白河水勢陡漲覓船駛渡十七八等日渡畢二十一日行抵潁灘與宋慶相見籌商會剿之策是時賊方攻破南陽之尹家寨屯聚各村議定宋慶一軍進左路張詩曰一軍進中路劉

松山一軍進右路行二里許步賊大隊分路撲近馬賊從兩旁包鈔勢甚披猖我軍三路迎敵戰未半時賊悉退守尹家寨爲負隅死拒之計劉松山揮眾猛攻一鼓下之各軍三路跟追至二十餘里之桑莊寨將賊踞村莊四十五處悉數奪回該逆大潰直奔向侯橋寨一路共計斃賊千餘人解散脅從甚夥是晚趕齊輜重整宿桑莊寨二十二日整隊進抵侯橋寨張牛馬步大隊蟻聚對河相距四五里各軍商定仍分中左右三路宋慶居左張詩曰居中劉松山居右而於中右兩路又各分中左右三路回環策應蟬聯而進由河之南轉折向東追至新野所屬之上仙岡賊股愈出愈多兩旁村莊步賊結成圓陣數十起分

列以待騎賊數千包鈔我軍之後劉松山見賊挾全勢來抗嚴
飭各營屹立穩持施放鎗礮步步轟擊未幾馬賊漸包漸近而
中路賊勢尤厚先以大股衝撲中路之右經彭秀清羅朝雲率
兩營抵住該逆卽直撲中路之左長矛數千分排林立我軍當
中路之左者爲知府銜浙江同知朱式雲督率星豫三營施放
噴筒步賊稍卻而馬賊又從星右營之後盤旋而入步賊於煙
焰中持矛衝突我軍以短兵鏖戰一以當十血戰半時之久賊
之矛桿摧折者猶徒手爭先裹創力戰星左營受敵最久幾不
能支朱式雲持刀躍馬往來督陣賊勢漸靡劉松山張詩曰約
同宋慶等率隊猛擊呼聲雷動立斃悍賊六七百名合軍追殺

十餘里遂收隊至上仙岡暫息是日計殺斃生擒及解散者不下三千名奪獲騾馬二百餘匹查點各軍陣亡者哨官花翎都司鄒明立一名受傷最重者副將黃瑞都司賀大有二名各勇陣亡者十八名受傷者二百四十九名由劉松山等詳細具報前來臣查張牛二逆前經劉松山張詩曰兩軍敗之於上蔡等處茲又追及南陽之尹家寨新野之上仙岡奮勇鏖戰雖殺賊不及前此之多而賊勢之悍臨陣之猛亦近來所罕見劉松山等聞豫軍被圍卽日馳援及解圍後卽與宋慶聯絡一氣同心苦戰尤得師克在和之義除將出力各員附上上蔡案內彙獎外其陣亡之花翎都司鄒明立一員仰懇

天恩勅部照陣亡例議卹以慰忠魂所有官軍在新野南陽等處勦賊獲勝緣由恭摺由驛馳陳伏乞

皇太后

皇上聖鑒訓示再此案已據河南撫臣具奏合併聲明謹奏

淮軍往來勦賊勝仗摺

同治五年九月十三日

奏爲劉銘傳潘鼎新兩軍往來勦賊屢獲勝仗并現籌防勦事宜恭摺仰祈

聖鑒事竊捻逆東竄後調兵追勦

臣

於八月二十三日奏明在

案劉銘傳一軍於二十七日馳抵城武潘鼎新一軍於二十六

日馳抵濟甯是時賊正麇聚鄆鉅之間山東撫

臣

閻敬銘派出

之王成謙王正起兩軍三次進勦屢獲勝仗二十六至三十等

日該逆猛撲運河之袁口靳口開河等處東軍抵禦嚴密未能

搶渡其長溝以下之運防李昭慶一軍修築堅固又經潘鼎新

一軍趕至濟甯軍威頗壯該逆未敢撲犯三十日劉銘傳潘鼎

新會於汶上境內之馬村探知賊俱盤據梁山前後火光橫亙數十里九月初一日劉銘傳一軍由蔡家陵進潘鼎新一軍由方家廟進分道直薄梁山賊之馬隊由東至西包鈔而來張景春烏爾圖那遜督馬隊迎勦劉盛藻唐殿魁率步軍繼進陣斬悍逆數十名馬賊敗走其另股步賊三千餘名馬賊數百人自北而南正與潘鼎新一軍相遇潘鼎琛余在榜等施放炸礮潘鼎立率隊從旁鈔擊賊卽轉向西奔我軍三面齊進該逆盡向王莊奪路竄走烏爾圖那遜追至王莊逕入賊隊手斬馬賊身受矛傷五處猶不少卻經張佩之率隊衝進救護回營北路劉盛藻唐殿魁從後追到南路潘鼎琛等攔頭擊之賊不敢戀戰

悉數狂奔我軍追至二十餘里殲賊無算因天晚俱各收隊查點旗兵陣亡一名馬勇陣亡受傷十餘名自有此戰賊已膽落次日向南回竄劉銘傳潘鼎新兩軍并力緊追初二至初五等日在鄆城荷澤曹縣東明等處或一日一戰或一日再戰該逆被躡窮急三次整眾來犯連不得逞殺傷逃散甚多牲畜器械遺棄遍地潘鼎新一軍初八日趕至杞縣接仗小勝劉銘傳一軍初八日趕至睢州該二軍於兩旬之間往來一千六七百里縱橫追逐迄未停趾現在杞縣陳畱一帶籌備米糧仍卽跟蹤追剿此次賊鋒已挫其勢或可稍衰旣不得志於東必仍狂竄而西臣已檄令劉松山一軍由扶溝以北向前迎剿并檄鮑超

一軍由南陽至南召魯山一帶遮截賊入洛陽之路如果驅賊南趨鄂境當一面派兵與鄂軍會剿一面畱兵再辦沙賈兩河防守事宜冀收夾擊之效除劉銘傳等軍初二至初五詳細戰狀另行續奏外所有淮軍往來追剿獲勝及現籌防剿緣由恭摺由驛五百里馳陳伏乞

皇太后

皇上聖鑒訓示謹

奏

水師報捐請廣學額摺

同治五年九月十三日

奏爲水師各營報効銀兩懇請加廣本籍學額恭摺仰祈

聖鑒事竊

臣

接准兵部右侍郎

臣

彭玉麟咨稱所部水師十營

積欠餉項陸續設法籌補現將同治二三年分欠餉補發外尙欠十一箇半月據各營稟稱從征十餘年轉戰六七省公誼私仇激於義憤今幸長江肅清金陵克復東南漸次廓清而餉源仍形支絀乃蒙籌補同治二三年分薪水口糧從枵腹習戰之餘得士馬飽騰之樂各營感激圖報特於補領口糧內共捐銀十萬兩以助軍餉不敢仰邀議敘惟各將士均籍隸湖南可否查照成案以銀三萬兩加廣衡陽縣永遠文武學額各三名銀

二萬兩加廣清泉縣永遠文武學額各二名銀五萬兩加廣衡州府永遠文武學額各五名以作士氣而廣

皇仁除將所捐銀兩發交水師糧台續發口糧外相應據情咨請具奏前來臣查彭玉麟所部水師十營積年以來欠餉甚鉅均經該侍郎設法彌補現據咨稱同治二三年分薪糧補發外尙欠十一箇半月各營將士體念時艱力顧大局願於補領薪糧內捐出銀十萬實屬深明大義出於至誠查戶部奏定章程凡捐輸銀一萬兩者准加文武定額各一名今水師各營合捐銀十萬兩請加廣衡陽縣永遠文武學額各三名清泉縣永遠文武學額各二名衡州府永遠文武學額各五名共廣定額十